

Il «C» sco handicap?

La PCD svizra decida il november davart il nov num

DA MARTIN CABALZAR/FMR

■ **Cun in nov num ed ina cooperaziun cun la PBD vul la PCD empruvar da fragnar la digren da ses electorat. Vi dals cuntegns politics na vul la partida dentant midar nagut.** En il «cas ideal» vegn la partida a prender questa decisiun a la delegada dals 14 da november, ha declerà il parsura da la PCD svizra *Gerhard Pfister* a las medias. Ed el precisèscha: «La PCD sa chatta en ina fasa da restructuraziun, dentant las valurs – quai demussa la retschetga – na stuain nus betg metter en dumonda.» Vi dals cuntegns politics na stoppian ins midar nagut. Quai conferma ina retschertga che l'institut gfs da Berna ha fatg en il decurs dals mais d'avrigl e matg tant tar la basa da la partida sco tar l'ulteriura populaziun.

Il «C» sco handicap

Sco quai che *Lukas Golder* da l'institut da perscrutaziun gfs ha infurmà ha la retschertga documentà ch' il «C» saja in dischavantatg per la PCD. En la percezziun da la populaziun vegnia la PCD associada cun «catolic». Ina midada dal num stgaffeschia perquai il pli tgunsch la schanza da pledentar novas stresas d'electuras ed electurs che sustegnan gia ils cuntegns da la PCD, uschia Golder.

Als commembers da partida sezs saja questa percezziun externa main cunscienta. Tenor Golder mussa la retschertga che 40 pertschient dals commembers da la PCD èn s'exprimids cleramain a favur d'in fundament cristian che duai er sa manifestar en il num.

En quest connex remartga Pfister ch'ì saja chapaveil ch'ìls electurs actuals da la PCD n'hajan nagin problem cun la denominaziun existenta da la partida. En il medem mument considereschia dentant



«Jau stun tar il C en il num da nossa partida» – Stefan Engler tar la radunanza da delegads il schaner passà.

FOTO OLIVIA AEBLI-ITEM

er ina clera maiortad dals agens commembers da partida che valurs cristianas en il num n'hajan nagin avegnir pli. Il cuntrari, in nov num porschia a la partida in potenzial da crescer.

Noziun «amez» ha buna acceptanza

La retschertga ha er demussà che la noziun «amez» vegn favurizada dals commembers da partida sco la varianta la pli attractiva tranter ils nums proponids. Quai saja probabel er d'attribuir al fatg che PCD, PBD ed EVP furman gia oz a Berna ina fracziun cuminaivla sut quest num, tira la secretaria generala da la PCD svizra *Gianna Luzio* en consideraziun. Ina surpraisa saja che betg commembers da partida favuriseschian la tezla «liber-

tad e solidaritad» en il nov num da partida. Pfister accentuescha en quest connex che «libertad e solidaritad» demonstreschian quai che la partida saja efectiva-main. En la terminologia politica stettian questas duas noziuns per ina partida cristiana. Golder situescha l'electorat potenzial da persunas che sustegnan las valurs da la PCD, n'èn dentant betg commembers, cunzunt en ils centers urbans, tar las dunnas ed en la Svizra romanda.

Partida populara stagl da milieu

La retschertga confermia – uschia Pfister – quai ch'el haja gia udi savens en la campagna electorala: La PCD na vegnia betg tschernida perquai ch'ella vegnia associada cun «cartent e catolic». Il fatg che la

partida haja in pli grond sustegn per sia politica che tar las elecziuns reveleschia a moda eclatanta quest problem da percezziun.

Pfister è perquai persvadi ch'in nov svegl cun in nov num pudessia tanscher per mobilisar novs interessents. Ensemen cun las partidas chantunales vul Pfister uss analisar e discutir ils resultats da la retschertga ed alura preschentar il november a la delegada svizra ina proposta. «En scadin cas na vegnin nus betg a proponer da cuntinuar sco fin quà.» En il decurs dals ultims 40 onns haja la partida pers cuntinadamain forza e vigur ed il segund sez en il Cussegl federal. «Quai ch'jau vi è sulet il success da la partida», di Pfister concludend.